



6. september 2024

UKA 2024/141

Inatsisartut Suleriaasianni § 36 naapertorlugu apeqquyteqaat aallaavigalugu siunnersuut imaattoq matumuuna saqqummiuppara:

Qanoq iliorutta Kalaallit Nunaanni amqip qalipaataanik immikkoortitsisarneq annikillisarinnaanerlugu apeqquyteqaat aallaavigalugu oqallisissiasatut siunnersuut.

(Inatsisartunut ilaasortaq Aqqalu C. Jerimiassen, Atassut)

Ajoraluartumik Kalaallit Nunatsinni inuiannik allanik nikaginninneq, akerartuinerlu tusarsaagaluttuinnaleqqapput.

Inuiaat Kalaallit immitsinnut nukittorsarniarluta isumaqalersimanerpugut inuiaat allat kalaaliunngitsut ajattoqqaarlugit nikanarsaqaarlugillu siuariartulersinnaasugut? Una oqallisissiaq qaqippara inuiaqatigiit politikikkut isummersorfiini kangiamiuluarneq qallunaanillu akerartuisarneq annertummat, politikkerillu allamiunik anisitsisariaqarnerat noqqaassutigineqartalerluni. Isumaqarpungalu aamma maani Inatsisartuni amqip qalipaataanik immikkoortitsisarneq qanoq isummerfigissallugu oqallisigisariaqaleripput.

Uagut inuiaat kalaallit nunasiaataasimasutut ilisimalluarparput inuianniit allaniit naqisimaneqarneq qanoq innersoq. Nuanninngilaq. Tujorminarpoq. Iliuusissaaleqinarporluunniit. Sulilu nukippassuit atorpagut immitsinnut siuarsarniarsarluta. Soormi nalunngikkutsigu oqaatsigut pillugit nikagineqarneq qanoq innersoq, nalunngikkutsigulu amitta qalipaataa pillugu nikassarneqarneq, soormi taava uagut nammineerluta inuiannut allanut aamma taamaaliornissaq pisariaqarsorilersimavarput?

Oqartoqassajunnarsivoq; immitsinnut aallaavigisariaqartugut allat salliunnagit. Apeqqutigerusupparali: Immitsinnut salliutissagutta allat ajattoqqaartariaqarpagut? Uagut pisinnaatitaaffeqassagutta allat pisinnaatitaaffiaqqaartariaqarpagut? Immitsinnut tatiginerussagutta allat nikassaqaartariaqarpagut? Ila taanna eqqarsartariaaseq oqaluttuarisaanermi allarpassuit sianiilliorlutik atugarisimavaat, inuiannik nungusaanernik, toqoraanernik, sorsunnernik malitsilinnik.

Oqartoqassajunnarsivorlu uagut inuiaat naqisimaneqartuarsimasugut nammineerluta amqip qalipaataanik immikkoortitsisutut taaneqarsinnaanngitsugut. Taanna patsisissapalaajuvoq immikkoortitsinermut kaammattuisoq. Inuit tamavitta naleqarpugut, tamavitta pisinnaatitaaffeqarpugut siuariassaguttalu kamassarujussuaq allanut tutsinniarunnaartariaqarpagut nammineerluta



siuariartornissatsinnut nukiit atorlugit. Inuiaat imminnut tatigisut pisariaqartinngilaat allanut nakkarsaanissartik.

Danmarkimi kalaaleq ataaseq aalakoortoq qallunaaniit takuneqarsimappat, nuannarinngivissorparput, allaallu kamannarerujussuarlugu inuiaat kalaallit tamatta imerajuttutut naqissuserneqassagutta. Assigiinnarpaalu nunatsinni kangiamioq ataaseq ajortuliorsimappat, taava kangiamiut tamavimmik ajortuliortartutut naqissuserniarsarisariaqarpagut? Nammineerlutami nalunngeqqissaarparput taamatut naqissuserneqarneq qanoq innersoq.

Kalaallit paasisariaqalerparput patriotisme aamma nationalisme assigiinngimmata. Patriotip nunani nunaqqatinilu illersorpai sukataarutigerusullugillu. Nationalistip nunani nunaqqatinilu illersorpai, misigalunilu tamanna sukataarutigissagaanni inuiaat allat nunallu allat akiorniaqqaartariaqarlugit.

Uagut kalaallit; ammip qalipaataanik immikkoortitseqqaarluta immitsinnut nukittorsarusuppugut? Immaqaluunniit allat nikageqqaarnagit immitsinnut nukittorsarsinnaavugut? Allaammi tusartalersimavarput kangiamiut kalaallinit persuttagaasimasut.

Tamaavitta maani inersuarmitugut minitaqarata kalaaleqatigut sullikkusuppugut. Taanna qularnanngilaq.

Inuummi imminnut tatigisup allamiuluarnissani pisariaqartinngilaa. Kalaallit ammip qalipaataanik immikkoortitsissappata tulluarsorinngilara. Nukigut siuariaatissanut atortigit, immitsinnut qaffassarta, allat nakkarsaqqaarnagit. Inuiaat allat namminiissapput, aamma uagut kalaallit namminiissaagut, namminersussaagut, aqquataani allat tullaatareqqaanngikkaluarlugit.

Ammip qalipaataanik immikkoortitsineq nunatsinni atunngisaannartigu.